

Tesalonika Vegenalitini Luhuva Nampa 2 Pauló Gizo Kimimó

Tesalonika vegená nónohá kimike gizo kimi gakó

1 ¹ Neza Paulona itó Sailasiko itó Timotiko makó nounike Tesalonika numutoka monó gele vegená ameteho Ómasi itó Guivahani Izesu Kilistó aí vegenala zuha nene luhuva netá imane gizo nolukumuve. ² Ómasi ameteho itó Guivahani Izesu Kilistoni hulu itó nasahilí lekelitoka vo aleko minino.

Izesú atiginá oko ati zupa goní ita gakó

³ Ligivetegita, lekelikumú Ómasi agepoka loaká nouni hoza lumupiló itekago aleaká nounimó nene lekeza Izesukumú gili alévolé iaká niamó nenémo napa oloko novigo itó likigika eza amigo eza amigo niamó nenémo napa oloko novigo ámina hoza etokave. ⁴ Lekelí gopoguni mililikitake gasova netá nimilikitago, miluma giliki miniake gili alévolé iki likigika gologolo samigo alévolé iki hanuva niave. Nene gakó gelekunike, Ómasímini vegenala zuha miniliki vamó keitoka nene lukugupe aleko iteaká nune.

⁵ Itó lukumupiló miluma netá utó noikumú láa loko litune: Ómasímo lihimatemú gona mololetati zupa nene hee loko gona moloko limitimó nenémini mogona lá oko utó okave. Ómasímo lekelikumú giligo etokago, aí avogisalo vi hilatakumule loko gasovagi netalímini amupiló lekezagi niave. ⁶ Nenemú minoko Ómasímo giligo, etokago, gasovagi netá ali likimiaká nia vegenatoka áminagó oko miluma netá nene ámina vegená kiminogo ive. ⁷ Lá ooko Guivahani Izesú nene amuzagi agelogege okulumakutí limita zupa nene gopoguni mililikitago miluma giliki miniaká nia vegenaki itó lezagi mino geleká apakú lelémo molanogo ive.

^a 1:1 Apo 17:1

⁸Lá nooko nene ló gulumagú lemeko Ómasímini mogona gelema vejená itó Guivahanite Izesuni gako lamaná gili alema vejená miluma hoza kiminogo ive. ⁹Lá nooko ezáa avogisalotí itó zámuzalalotí itó lapanalalotí kehélú ahulokiko, mini golesaló iliki viki minanigave. Ómasímo miluma hoza lá oko nokimiko, ¹⁰Izesú atiginá oko ati zupa nene aí vejenala zuhate aí gonanalivagi lapaná ali otinigave, itó monola gili alévolé ina vejenalite sigaga litanigave. Lekeza ámina gako lo lekemekuko gili alévolé ina vejená nianazo, nenemú lekelisi ámina vejenaki minanigave.

¹¹Nenemú leza gamena gamena lekelikumú Ómasiloka loaká nounimó nene Ómasi eza sele lo likimimó nenémini lelegitó iki miliki itave loko, itó aí zámuzatunú hize lé olikimikiko, netá lamaná loló itune liki gili miniaká niamó itó gili alévolé iaká niamó nenémini hozaváa aliliki vitave loko loaká nune. ¹²Itó lekeza lá ikiko, Ómasile itó Guivahanite Izesu Kilistó nasahilí olimiaká noimó nenazo, Guivahanite Izesuni agulizá lekelisi ali otitaze, itó ámináminoko aí lapaná lekelitoka utó noiko, eza lekelí lukugulizá ale otitive.

Lo huka gako gele ahuloaká vema utó iti gako

2 ^{1b} Nigivénegita, Guivahanite Izesu Kilistó ati gamena itó aitoka lelémo nupa iti gamena nenémini gako láa lo likimitoze, gililo. Neza lakagata aleko láa loko lo likimitove: ²Vejená keza Ómasímini agepagutú gakokumupe itó gako makokumupe itó luhuva netá makokumupe Pauló gizamole liki niliki Guivahanímini gamena mota okave liki nilikoma, lekeza litá iki gili gopa iiki mulutini itemino. ³Gako némini manámini lilikitiki likilími gopa ikataze, nenemú láa liki gililo: Apí oko Ómasi lova ali amiaká vejená utó ikiko, itó lo huka gako gele ahuloaká ve lolímini mututoni loló inogo i vema utó okiko, Guivahanímini gamena alika utó inogo ive. ^{4c} Lo huka gako gele ahuloaká ve nenémo vejenalite gelego ómai netá loló oaká noi netá itó vejenalite gupá zi amiaká nia netá nene lova ale amekoko keí holúikutí nene ezáa agupe aleko itinogo ive. Lá okoko Ómasímini monó zagusave napagú iteko minokoko ezámú nénisi Ómasi nouve loko linogo ive.

⁵Nénisi lekelitoka minuke, gako láa loko lo lekemeva lekemeva umó nene lakagatí molokahe. ⁶Itó imane gamenaló ámina vémini gapova lí oaká netá nene gilinave. Ómasímo mola gamenaló eza utó inogo ive. ⁷Imane gamenaló netá golesa aleaká vémo asugunatoka hoza aleaká noimóza, Ómasímo ámina ati vémini gapo hize lí oaká noi vema ale ahulomikiko, eza utó inogo ive. ^{8d} Ómasímo lo huka gako gele ahuloaká vema utó okiko, Guivahani Izesuni agepa múnizámo apele hilinogo ive. Guivahani anititi zupa nene lapanalagi zámuzagi nooko alémo golesa

^b 2:1 1 Tes 4:15-17 ^c 2:4 Tan 11:36; Izi 28:2 ^d 2:8 Isa 11:4

inogo ive. ⁹ Lo huka gako gele ahuloaka vemamo Satani zamuzagi aniteoko haitopaito suni alévolé netá mukí nene soza moloko ale utó inogo ive. ¹⁰ Lá okoko vejená lugáa latila oakalímíni mututoni nene haitopaito suni golesa aleko kogoka vizinogo ive. Keza gako gihila lamanakumú kumu helemiko gili ahulatamó nenemú Ómasímo kugutó vizeminogo ive. ¹¹ Vegená keza lá iaká nitakumú Ómasímo lokiko, kogoka vizeaká izolahináa utó okiko nene, aí soza gako gili zaginigave. ¹² Lá ikiko gako gihila nene gili ahuliiki, netá golesamú laga kivisiti vejená mukitoka nene lihima napa kumupiló itinogo ive.

Lugutó vizitove loko Ómasímo lelémó etó imó

¹³ Ligivetegita, Guivahanímo agika likimi vejená lekeza Sikalahulímo likigika nagamí zelikimikakeve loko itó gako gihila gili zagikakeve loko lekelí nene apí oko lukugutó vizitove loko Ómasímo ezáa lekelémó etó ikumú nene gamena gamena Ómasi agepoka loaká hoza lumupiló itekago aleaká nune. ¹⁴ Lekeza lá itave loko gako lamanáma lo lekemekuko giliiki Guivahanite Izesu Kilistoni gonanalivagi lapaná ali lá itave loko Ómasímo lekelémó etó imó neve. ¹⁵ Nenemú ligivetegita, lekeza likigika mili alévolé iiki lepegagutí gako loká itó luhuva netá ze lekemeká unike lainim-oleketunimó nene ali gikitiki ali minalo. ¹⁶ Guivahanite Izesu Kilistoki itó Ómasi ametehe eza agika lelitoka moloake nasahilí oletakeve loko lelémó huluga loaká netá mino lúaló moloko minoakalímíni itó netá lamanakumú lagata losi gelemoko ageva oaká nouhá netá ale utó oleta ve ¹⁷ áisi nene likigika nagá zeko hize lé olikimikiko, gako gihila loaká itó hoza gihila aleaká nene lekelitoka lemeko akamino.

Lelikumú Ómasiloka lilo

3 ¹ Nigivénegita, gako makó lo asú oko lo likimitoze, gililo. Guivahanímini gako nene puu loko vitive loko, itó lekelitoka utó okago gihila zimó nene áminagó oko vejená makotoka gihila zitive loko lelikumú Ómasiloka lilo. ² Itó vejená makolite monó nene avasavagi gili asú isá amanazo, kigika golesagi vejená lihimáinigi vejenalítini kigizakutí akagá oletative liki Ómasiloka numuna lilo.

³ Guivahanímo lokago alévolé oaká i vémo luhusatini ale kii loleketoko ve golesámo lekelémó golesa okative loko lekelémó vatí oko alata mololeketanogo ive. ⁴ Lekeza nene gako loleketunimó nene gili aliaká niakumú itó gili aliiki ámegetiki minatakumú Guivahaniloka gímizekamole loko lelikikumú lagata losi gelemingó une.

⁵ Guivahanímo likigika ale vávani iko, Ómasímo agika lekemeaká noikú itó Kilistó alévolé oko oko moloko ikú miní amitave loko Ómasiloka noluve.

Hoza alemoko zogozogo vizeaká gakó

⁶Nigivénegita, Guivahani Izesu Kilistoni agulizató nene hoza gakó láa loko nololeketune: Izesuni vejenala zuha luguhá nenete gakó lo lukumuható iki gímizemake, hoza alemake, gopa miniaká niave. Nene vejenaki apiziki minamilo. ⁷Leza lekelitoka vuni zupa nene gapo veleleketoko hoza aleaká unimó nene mota gilinave. Lekeza ámináminiki lémegetalo. Leza lekelitoka nene hanuva minosá amuháma neve. ⁸Lekelitokatí nosánetá meinaváa nomimó hanuva noloko vova vova amuháma neve. Nagá zeko ale nominuko goselé lekepelekative loko lugupeló netá meina hizitune loko únaká neteká miluma hoza aleaká unimóma neve. ⁹Itó lekelitokatí nosánetá alitave loko lo hukoletonoimóma nemóza, mogaonáa lekelepizunike lelí ligizakagú lisatave loko hoza lá oko aleaká unimó neve. ¹⁰Lekelitoka minunike ve makolímó hoza alemoko zogozogo vizitimó nene, nosánetá mosimikiko namino loko lo lekemenounimóma neve. ¹¹Itó imane lekelitokatí gakó makó aliake vejená lugáate kezáini hozanini ahuliake zogozogo viziki ve makolitini hozagú gavakavató mihina iaká niave liki likago gelekune. ¹²Vegená nenémináa keza Guivahani Izesu Kilistoni gakotó kagata aleko láa loko noloketune: Keza legesó iki hozáini alikiko, gihila utó iko nataze. ¹³Nigivénegita, lekeza mogona lamaná loló oakakumú goselé lekepelemino. ¹⁴Imane pepagú gakó gizo nolukumumó nene makolímó gele ahulokikoma, aí mogaonamú giliiki nene ahulikiko, ezáagó minoko avoza hilitize. ¹⁵Nene lova ali amitave loko lamuve. Ligivetehove liiki agata aliki alími vevesalo.

Nónohá zeketa gakó

¹⁶Guivahani eza hulu amelaho gamena gamena haitopaitó suni aleko hulu ale utó oleketino. Guivahani nene lekelitoka minoloko voko minino. ¹⁷Neza Paulona itínasa luhuva nogiza vémini agizakutí luhuva gizoaká nogosanima alekuke nigizanitunú luhuva imane nogizumó nene není anosave loko nene nogizuve. Neza gamena gamena není luhuva lá okogó gizoaká nouve. ¹⁸Guivahanite Izesu Kilistoni nasahilí lekélí mukitoka mino moloko minino.